

Kunjung Hormat Persatuan Kontraktor G1 ke Jabatan Pendidikan Erat Kerjasama



Labuan, 9 April : Persatuan Kontraktor G1 Wilayah Persekutuan Labuan telah mengadakan kunjungan hormat kepada Pengarah Pendidikan W.P. Labuan di pejabatnya di Tingkat 10 Ujana Kewangan sempena pelantikan Encik Yusup bin Haji Mohamad sebagai Pengarah Pendidikan yang baharu, hari ini.

Rombongan ahli jawatankuasa tertinggi persatuan telah diketuai oleh Tuan Haji Ceh Mat Haji Mustafa, Pengerusi Persatuan Kontraktor G1 Wilayah Persekutuan Labuan.

Ketibaan rombongan seramai 10 orang pada jam 9.00 pagi telah disambut oleh Ketua Penolong Pengarah, Sektor Infrastruktur dan Perolehan (SIP), Encik Boney Joumil.

Dalam pertemuan itu, Encik Che Mat mewakili ahli persatuan mengucapkan tahniah kepada Encik Yusup kerana telah dilantik menerajui Jabatan Pendidikan W. P. Labuan.

Beliau turut menyuarakan hasrat ahli persatuan untuk mempertimbangkan beberapa prosedur sedia ada bagi memudahkan penyertaan ahli dalam sebutharga bagi kerja-kerja di bawah kawalan Jabatan Pendidikan.

“Terdapat beberapa perkara yang membebankan pihak kontraktor G1 seperti pengesahan setiap salinan penyata bank bagi setiap dokumen sebutharga. Selain itu kami juga berharap agar senarai kontraktor yang berjaya dipamerkan untuk rujukan penyebutharga” katanya.



Encik Che Mat menyuarakan hasrat ahli persatuan Kontraktor G1 kepada Encik Yusup. Dalam maklumbalas, Encik Boney menyatakan bahawa pihak jabatan terikat dengan peraturan-peraturan Kementerian Pendidikan Malaysia yang perlu dipatuhi.

“Setiap penilaian sebutharga di peringkat jabatan sangat telus dan teratur dengan melibatkan tiga peringkat penilaian di mana individu yang berlainan terlibat di setiap peringkat” jelas beliau lagi.

Dalam ucapan balas, Encik Yusup turut berharap agar pihak kontraktor dapat memberi sumbangan dengan menyediakan

perkhidmatan yang terbaik berkaitan kerja-kerja penyenggaraan dan pembinaan di sekolah.

“Matlamat kita ialah menyediakan fasiliti dan kemudahan fizikal yang terbaik kepada anak-anak di Labuan. Apapun yang kita buat di sekolah, akhirnya nikmat dapat dirasakan oleh anak-anak di pulau ini” tambah beliau lagi.

Hadir sama dalam pertemuan tersebut ialah Timbalan Pengarah Sektor Perancangan(SPr) , Encik Mohd Nizam bin Yasim, Timbalan Pengarah Sektor Pembangunan Murid (SPM), Tuan Haji Abdul Rahman Ahmad.

Berita Oleh : Sektor Perancangan



Pemuafakatan Komuniti Selesaikan Isu Pengoperasian Sekolah



Labuan, 26 Mac : Jabatan Pendidikan telah mengambil inisiatif dengan mengadakan pemuafakatan bersama komuniti dalam menyelesaikan isu pengoperasi sekolah sepanjang tempoh PKPP, kelmarin.

Pemuafakatan melibatkan beberapa agensi dan pertubuhan bagi mencari kaedah terbaik bagi mengatasi isu kepadatan, penjarakan fizikal di dalam bilik darjah dan isu-isu berkaitan penyuraian murid.

Antara agensi yang hadir dalam sesi pemuafakatan tersebut ialah Jabatan Kesihatan W.P Labuan, wakil PIBG, wakil Ahli Lembaga Pengurusan sekolah dan pentadbir sekolah.

Sesi perbincangan telah dipengerusikan oleh Pengarah Pendidikan W.P Labuan, Encik Yusup bin Haji Mohamad.

"Hasil daripada pemantauan oleh Jabatan Kesihatan

Negeri (JKN) W.P. Labuan, terdapat beberapa perkara yang perlu ditambahbaik di peringkat sekolah bagi memastikan sesi pembelajaran bersemuka dapat dilaksanakan dalam keadaan selamat”

“Kita mahu anak-anak yang hadir untuk sesi pembelajaran secara bersemuka sentiasa berada dalam keadaan selamat. Ini termasuklah langkah-langkah kawalan keselamatan di seluruh kawasan sekolah dan tidak terhad kepada di dalam bilik darjah sahaja” kata beliau.

Timbalan Pengarah Jabatan Kesihatan Negeri, Dr. Mohd Zaki bin Abd Hamid berkata pematuhan kepada SOP adalah sangat penting bagi mengekang penularan pandemik terutamanya di peringkat sekolah.

Pihaknya juga sentiasa bersedia untuk memberi kerjasama kepada mana-mana pihak dalam membantu menambahbaik langkah-langkah kawalan premis dalam mencegah Covid-19 daripada terus merebak.

Turut hadir dalam majlis tersebut ialah Timbalan Pengarah Sektor Perancangan, Encik Mohd Nizam bin Yasim, Timbalan Pengarah Sektor Pengurusan Sekolah, Puan Maimoon binti Matnoh dan KPP Sektor Infrastruktur dan Perolehan, Encik Boney Jumil.

Berita Oleh : Sektor Perancangan

TKPPM (SOS) Lakukan Lawatan

Kerja Ke Labuan



Labuan, 23 Mac : Jabatan Pendidikan W.P Labuan telah menerima kunjungan dan lawatan kerja Timbalan Ketua Pengarah Pendidikan Malaysia(TKPPM) Sektor Operasi Sekolah (SOS) , Dato' Haji Adzman bin Talib bermula 20 hingga 22 Mac 2021.

Lawatan selama 3 hari itu adalah bertujuan untuk memastikan pengoperasian sekolah rendah dan persediaan pembukaan sekolah menengah mulai 8 April ini berjalan lancar dalam tempoh PKPP.

Menurut Timbalan Pengarah Sektor Pengurusan Sekolah (SPS), Puan Maimoon binti Matnoh selaku penyelaras program, selain mengadakan pertemuan dengan pegawai-pegawai jabatan pendidikan, TKPPM turut dijadualkan melawat beberapa sekolah di wilayah ini.

“Antara fokus lawatan ialah melihat kaedah dan amalan sekolah-sekolah dalam menerima kehadiran murid setiap pagi dan sesi penyuraian murid-murid sekolah” tambah beliau lagi.

Kunjungan ke ibu pejabat Jabatan Pendidikan W. P Labuan telah dibuat sejurus selepas ketibaan Dato' Haji Adzman di pulau bertuah ini. Kehadiran TKPPM (SOS) telah disambut oleh pegawai-pegawai jabatan yang diketuai oleh Pengarah Pendidikan, Encik Yusup bin Haji Mohamad.

Turut menyambut kehadiran beliau ialah YDP MPSM, Encik Ismail bin Abdullah dan YDP MGB, Puan Dayang Saripah A. Mahmud.



Dato' Haji Azman menandatangani buku pelawat sambil diperhatikan Pengarah dan Timbalan-timbalan Pengarah JPWPL

Dalam ucapan alu-aluan, Encik Yusup telah menerangkan tentang halatuju dan pelan strategik Jabatan Pendidikan W. P. Labuan dalam tempoh 2021 hingga 2025.

"Kita akan berusaha bersungguh-sungguh untuk meletakkan pendidikan Labuan di landasan terbaik. Dalam hal ini kita akan mengukuhkan program-program pendidikan di peringkat negeri dan memperkasakan aktiviti-aktiviti kebangsaan. Kita juga telah menjalinkan hubungan antarabangsa dengan KUPU Brunei dan NPO SAM, Jepun". kata beliau lagi.

Puan Maimoon binti Matnoh, Timbalan Pengarah SPS turut menyampaikan taklimat ringkas berkaitan pengoperasian sekolah rendah dari aspek kehadiran murid dan sesi penyuraian sewaktu balik.

Dalam ucapan, Dato' Haji Adzman berkata tujuan utama lawatan kerja ialah untuk mendapat gambaran yang lebih jelas tentang kesiapsiagaan dan pematuhan sekolah terhadap amalan-amalan dalam norma baharu.

"KPM telah membuat satu keputusan yang sukar untuk membenarkan murid-murid kembali ke sekolah. Kita mengakui bahawa sesi persekolahan secara bersemuka adalah amat penting bagi setiap murid mendapat akses kepada pendidikan terbaik. Justeru kita perlu memastikan keselamatan murid dan warga sekolah sentiasa terjamin dengan mematuhi SOP yang telah disediakan" tegas beliau.

Dato' Haji Adzman telah melawat ke lima buah sekolah sepanjang 3 hari lawatan beliau di wilayah ini. Secara keseluruhan beliau berpuashati tahap kesiapsiagaan dan pematuhan sekolah-sekolah di Labuan dalam mengekang penukaran pandemik Covid-19.



Encik Ismail berbincang dengan Dato' Haji Azman SOP kehadiran murid ke sekolah SMK Labuan



Dato' Haji Azman memberi penerangan kepada guru-guru SMK Pantai



Lawatan Kerja TKPPM(SOS) ke asrama SM Sains Labuan



Dato' Azman sedang mengukur kedudukan jarak 1 meter di bilik darjah SK Sungai Bedaun



Tahniah, inisiatif JPWPL menyediakan 20 sinki setiap sekolah untuk kemudahan murid mencuci tangan



Dato' Haji Azman berpuas hati dengan Sekolah Kebangsaan SK Pekan Satu yang memperkenalkan sistem e-Mulih iaitu sistem penyuraian murid yang sistematik Beliau juga telah mengadakan sesi lawatan ke bilik-bilik darjah bagi memastikan penjarakan fizikal di antara

setiap murid mematuhi SOP yang telah ditetapkan oleh KOM.

"Saya ingin mengucapkan tahniah atas inisiatif yang telah diambil oleh Jabatan Pendidikan kerana menyediakan sekurang-kurangnya 20 sinki di setiap sekolah secara tetap dan dibuat dengan begitu kemas. Inisiatif ini telah memudahkan murid-murid untuk mencuci tangan secara kerap dan menjaga kesihatan" kata beliau selepas melawat sekolah-sekolah.

Di akhir sesi lawatan, beliau sempat meninjau sesi penyuraian murid di SK Pekan Satu.

"Saya berpuashati dengan kaedah-kaedah penyuraian murid yang telah diamalkan oleh sekolah-sekolah di Labuan berdasarkan model-model yang telah dicadangkan. Saya juga mengucapkan terima kasih atas kerjasama pihak PIBG, PDRM, RELA dalam memastikan penyuraian murid secara tertib" tambah beliau.

Berita Oleh : Sektor Perancangan



Pelancaran Pelan Strategik Jabatan Pendidikan Wilayah Persekutuan Labuan 2021-2025



Bersama warga Jabatan Pendidikan Wilayah Persekutuan Labuan



Lawatan kerja ke Sekolah Kluster Kecemerlangan Sekolah Kebangsaan St Anne, Labuan



Lawatan Kerja ke Sekolah Menengah Kebangsaan Pantai, Labuan



Lawatan kerja ke Sekolah Kebangsaan Sungai Bedaun, Labuan



Lawatan kerja ke Sekolah Menengah Kebangsaan Labuan

Kempen Derma Darah Hari Guru 2021 Peringkat W.P Labuan Dapat Sambutan



Labuan, 20 Mac : Program Kempen Derma Darah sempena sambutan Hari Guru 2020 Peringkat Wilayah Persekutuan Labuan telah mendapat sambutan yang sangat menggalakkan.

Kempen Derma Darah ini merupakan antara program-program anjuran Jabatan Pendidikan Wilayah Persekutuan Labuan sempena sambutan Hari Guru peringkat negeri tahun 2021.

Program ini merupakan inisiatif untuk membantu menambahkan tabung darah di Hospital Labuan demi rawatan pesakit dan juga kes-kes kecemasan. Kempen derma darah ini juga bertujuan untuk meningkatkan kesedaran dan memberi peluang kepada semua guru serta orang awam untuk menunaikan tanggungjawab kemasyarakatan. Selain, memupuk sifat penyayang dan sedia membantu tanpa mengira bangsa dan agama.

SMK Taman Perumahan Bedaun (SMKTPB) merupakan sekolah zon pengelola, telah berjaya menambah tabung darah Hospital Labuan sebanyak 44 paket darah.



Antara guru yang telah memberikan sumbangan bakti dalam Kempen Derma Darah Sambutan Hari Guru 2021 W.P Labuan





Guru-guru menunggu giliran untuk menyumbang darah. Pengetua SMKTPB selaku Pengerusi Jawatankuasa Pengelola Sambutan Hari Guru 2021, Encik Ag. Rozlan bin Manan merakamkan ucapan terima kasih kepada semua pihak yang telah bersama-sama menjayakan program khidmat masyarakat melalui kempen derma darah.

Jutaan terima kasih diucapkan kepada pihak Hospital Labuan kerana bersama-sama merealisasikan program kemasyarakatan ini.

Beliau turut merakamkan ucapan terima kasih dan tahniah kepada semua penderma darah yang telah melaksanakan tanggungjawab masing-masing. Beliau juga bersyukur kerana program yang dirancang berjalan dengan lancar dan berjaya mencapai objektifnya.

Penderma boleh menderma darah sekiranya tidak mempunyai sebarang masalah kesihatan. Sijil penghargaan dan hamper

telah diberikan kepada penderma darah yang mendaftar terlebih dahulu sebagai penderma darah.

Walaupun dalam situasi negara menghadapi pandemik Covid-19, program derma darah ini merupakan landasan terbaik untuk memberikan kesedaran kepada masyarakat khususnya dalam kalangan guru-guru di Wilayah Persekutuan Labuan untuk menderma darah ekoran stok bekalan darah yang semakin susut bekalannya.

Malahan, program ini juga dapat membuka mata warga guru bahawa betapa pentingnya 1 paket darah dapat menyelamatkan nyawa seseorang.

Kempen derma darah diakhiri dengan penyampaian sijil penghargaan kepada pihak pengurusan Hospital Labuan oleh Sekolah Zon Pengelola Sambutan Hari Guru Peringkat WP Labuan Tahun 2021 bagi pihak Jabatan Pendidikan WP Labuan.

Turut hadir bersama dalam program ini ialah Pn. Chai Yee San (Pen. Kanan Pentadbiran) selaku setiausaha JK Pengelola Sambutan Hari Guru, Pn. Lau Chin Ying (Pen. Kanan Kokurikulum), guru-guru kanan bidang serta AJK yang terdiri daripada guru-guru SMKTPB.

Berita Oleh : SMK Taman Perumahan Bedaun



Tiga orang penderma darah yang terawal hadir menerima sijil dan hadiah daripada En. Awang Rozlan



Antara guru yang menerima sijil penghargaan kerana mendaftar awal sebagai penderma darah.



En. Ag Rozlan menyampaikan sijil penghargaan atas jalinan mengadakan program kepada pihak Hospital Labuan



Setinggi-tinggi tahniah Encik Ag Rozlan bersama barisan guru SMKTPB yang bertugas sebagai AJK.

Repsol Oil & Gas Malaysia Limited Suntik Motivasi Murid Komuniti Nelayan Labuan



Labuan, 5 Mac 2021 – Syarikat Repsol Oil & Gas Malaysia Limited sentiasa komited bagi membantu menyuntik semangat dan motivasi murid di kalangan anak-anak nelayan di wilayah ini.

Pengurus Stakeholder Relations, Repsol Oil & Gas Malaysia Limited, Encik Ahmad Fakhurazzi Arshad berkata syarikat yang berpangkalan di Madrid, Sepanyol ini sentiasa komited dan prihatin untuk membantu masyarakat komuniti tempatan di mana syarikat mereka beroperasi.

“Anugerah Motivasi pada hari ini merupakan kesinambungan usaha-usaha tersebut yang memfokuskan kepada pendidikan, khasnya kepada anak-anak nelayan di Wilayah Persekutuan Labuan yang masih di bangku

sekolah.

Hasrat kami adalah untuk membantu dan menyuntik semangat dikalangan anak-anak ini untuk mencapai kecemerlangan dalam akademik dan aktiviti kokurikulum sekolah. "

Dalam Majlis Anugerah Motivasi Murid Golongan Komuniti Nelayan Tahun 2021 yang telah berlangsung secara maya ini, Pihak Repsol telah menghulurkan bantuan sebanyak RM400 kepada murid Tingkatan 3 yang lulus PT3 dan RM300 kepada murid Tahun 6 yang lulus dalam UPSR pada tahun lalu.



Encik Yusup (tengah), Tuan Haji Abdul Rahmam (kiri), Encik Nizam (kanan), Encik Ag. Marten (belakang kanan) dan Encik Mohamad (belakang kiri)
Pengarah Jabatan Pendidikan Wilayah Persekutuan Labuan, Encik Yusup Mohamad merakamkan ucapan terima kasih kepada pihak Repsol di atas usaha murni dalam membantu pelajar dari golongan komuniti nelayan berpendapatan rendah sebagai motivasi dalam pelajaran dan kehidupan mereka.

“ Dengan bantuan ini, kita berharap para pelajar akan menggunakan wang bantuan itu dengan sebaik-baiknya dan menggunakan bantuan itu untuk membeli peralatan sekolah dan buku-buku pelajaran,” katanya.

“ Saya berharap program ini dapat diperluaskan kepada pelajar-pelajar lain yang layak dan menjadikan program ini salah satu program utama secara ‘one off’ yang menjadi fokus utama khidmat masyarakat daripada pihak Repsol,” katanya.

Hadir sama, Timbalan Pengarah Sektor Perancangan Encik Mohd Nizam Yasim, dan Timbalan Pengarah Sektor Pembangunan Murid Tuan Haji Abdul Rahman Ahmad dan Datuk Eddie Abdullah Penasihat, Perhubungan Masyarakat & Kerajaan Negeri Sabah dan Labuan.Repsol Oli & Gas Malaysia Limited.



Datuk Eddy (kiri) bersiaran secara langsung di ibu pejabat Repsol Kuala Lumpur

Jabatan Pendidikan Labuan anjurkan Bengkel Kajian Tindakan Peringkat Kebangsaan



Pengajaran dan Pembelajaran (PdP) yang berkesan memerlukan kepada penambahbaikan berterusan. Setiap guru perlu berusaha untuk meningkatkan kualiti pengajaran melalui pelbagai kaedah sesuai dengan situasi semasa.


Menyedari kepentingan ini, Jabatan Pendidikan Wilayah Persekutuan Labuan mengorak langkah untuk menganjurkan Bengkel Kajian Tindakan Teknik 12 Langkah peringkat kebangsaan.

Menurut Timbalan Pengarah Pendidikan Sektor Perancangan, Encik Mohd Nizam bin Yasim merangkap pengurus program, bengkel empat siri yang bermula daripada 4 Mac sehingga 8 April ini telah mendapat pengiktirafan Kementerian

Pendidikan Malaysia (KPM) sebagai program peringkat kebangsaan. Bengkel melibatkan penyertaan seramai lebih 1600 orang daripada 16 buah negeri di seluruh Malaysia.

“Sesuai dengan situasi pandemic Covid-19 yang belum berakhir, kita telah mengambil inisiatif untuk melaksanakan bengkel ini secara dalam talian sepenuhnya. Ini adalah satu sejarah bagi Labuan kerana buat pertama kalinya kita menganjurkan bengkel sebegini besar secara dalam talian”

“Oleh kerana sambutan yang sangat menggalakkan daripada warga pendidik seluruh negara, kita menggunakan platform webinar untuk tujuan penyiaran. Selain itu, pasukan penyiaran (broadcaster) juga telah menggunakan pelantar maya seperti facebook live dan Youtube live bagi memastikan semua peserta mendapat akses kepada bengkel ini mengikut kesesuai masing-masing” kata beliau.



TEKNOLOGI... Medium youtube live turut digunakan bagi memastikan setiap peserta mendapat akses terbaik kepada bengkel ini.

Kajian Tindakan Teknik 12 Langkah telah diperkenalkan oleh Puan Suriani Alland Rice Oxley sejak tahun 2017. Beliau yang merupakan Jurulatih Pakar Pembangunan Sekolah

(SISC+) telah berjaya mengharumkan nama Labuan dengan menjadi Naib Johan Inovasi dalam Konvensyen SISC kebangsaan pada tahun 2018 melalui inovasi Teknik 12 Langkah ini.



SURIANI ALLAND RICE OXLEY, Pencipta Kajian Tindakan Teknik 12 Langkah

Bagi melicinkan perjalanan bengkel, seramai 12 jurulatih utama (JU) telah dilantik dan diketuai sendiri oleh Puan Suriani. Jurulatih akan membantu semua peserta dalam memahami Teknik 12 Langkah ini melalui bimbingan dalam lima saluran selari.

Bercakap semasa merasmikan bengkel ini, mantan Pengarah Pendidikan W.P. Labuan, Puan Khaziyati binti Osman berkata setiap guru perlu bersedia untuk terus meningkatkan kompetensi masing-masing.

*“Kajian tindakan adalah platform terbaik bagi setiap warga pendidik meningkatkan prestasi PdP dengan membuat penambahbaikan berterusan. Warga pendidikan mesti bersedia untuk **learn, unlearn and relearn** bagi menjamin pengetahuan dan kemahiran pendidik sentiasa relevan dengan keperluan semasa” ujar beliau lagi.*

Bangunan Sektor Sumber dan Teknologi Pendidikan (SSTP) di Sungai Lada telah dijadikan pusat penyiaran bagi bengkel

ini. Seramai 8 ahli pasukan penyiaran bertungkus lumus bagi memastikan perjalanan bengkel secara dalam talian ini berjalan lancar. Akses kepada bengkel ini boleh dicapai melalui laman <https://sites.google.com/view/kolokium-kebangsaan-jpnwpl/utama> dan saluran Youtube <https://www.youtube.com/watch?v=S0zMX5Z0Chk>



BELAKANG TABIR, Sebahagian daripada ahli pasukan penyiaran bertungkus lumus memastikan penyiaran bengkel berjalan lancar.



BERJAYA, sebahagian daripada ahli jawatankuasa pelaksanaan bengkel bergambar setelah selesai siri 1 semalam.

Anak Jati Labuan Pengarah Pendidikan Wilayah Persekutuan Labuan Baharu



Encik Yusup bin Haji Mohamad, Timbalan Pengarah Sektor Pembelajaran telah dilantik sebagai Pengarah Pendidikan W.P. Labuan yang baharu menggantikan Puan Khaziyati binti Osman berkuatkuasa pada 1 Mac 2021.

Puan Khaziyati Osman pula akan menjawat jawatan sebagai Pengarah Institut Aminuddin Baki (IAB) Negeri Sabah berkuatkuasa pada tarikh yang sama. Pelantikan pengarah negeri yang ke lapan ini telah diumumkan secara rasmi oleh Datuk Dr. Habibah binti Abdul Rahim, Ketua Pengarah Pelajaran Malaysia (KPPM) pada 1 Mac 2021. Sesi pertemuan telah dibuat secara maya kerana kekangan pandemic Covid-19.

Dalam pertemuan tersebut, Datuk Dr. Habibah sempat berbincang dan berkongsi pandangan bersama-sama Encik Yusup berkaitan perjalanan pembukaan semula sekolah bagi murid-murid Pra sekolah, Tahun 1 dan Tahun 2 di Wilayah

Persekutuan Labuan.

KPPM juga turut mengucapkan setinggi-tinggi tahniah atas pelantikan ini dan berharap agar amanah yang dipertanggungjawabkan dapat dilaksanakan dengan penuh dedikasi demi kecemerlangan pendidikan.

Encik Yusup adalah anak jati Wilayah Persekutuan Labuan yang pertama dilantik sebagai Pengarah Pendidikan W.P.Labuan. Pelantikan ini telah merealisasikan harapan penduduk Labuan untuk melihat seorang anak watan negeri ini menjawat jawatan tertinggi dalam sesebuah organisasi di wilayah ini. Tambahan pula, Jabatan Pendidikan adalah agensi kerajaan yang terbesar di pulau ini.



LAPOR DIRI... Encik Yusup menandatangani buku lapor diri di Jabatan Pendidikan W.P.Labuan dan disambut oleh tiga Timbalan Pengarah iaitu Encik Abdul Rahman, Encik Mohd Nizam dan Puan Maimoon.

Encik Yusup adalah anak kelahiran Kampung Patau-Patau 1. Beliau memulakan karier sebagai pendidik sebagai Guru Tingkatan 6 di SMK Labuan pada tahun 1993 sebelum dilantik menjadi Pengetua SMK Taman Perumahan Bedaun pada

tahun 2001 pada usia 33 tahun. Semenjak itu beliau telah berkhidmat di beberapa buah sekolah di Wilayah Persekutuan Labuan termasuklah menjawat Pengetua SMK Pantai, IBWS dan SMK Lajau.

Kerjaya beliau berkembang selangkah lagi apabila dilantik sebagai SIPartner+ (Rakan Pembangunan Sekolah) pada tahun 2018. Atas kecemerlangan dalam perkhidmatan, beliau telah dilantik menjadi Timbalan Pengarah Sektor Pembelajaran pada awal tahun 2019 menggantikan Puan Norismah binti Hj Ab. Moin yang bersara wajib.

Pengalaman beliau yang pelbagai dan atas kecemerlangan pengurusan yang ditunjukkan, maka pada tanggal keramat 1 Mac 2021, beliau telah diperakui sebagai Pengarah Pendidikan Jabatan Pendidikan Labuan yang ke lapan.


Mengulas pelantikan ini, beliau melahirkan rasa syukur kepada Allah dan berterima kasih kepada semua pihak yang telah bersama-sama menyokong kerjaya beliau dari dahulu sehingga ke hari ini. Beliau turut menyeru agar semua pihak dapat terus bekerjasama bagi menjamin kecemerlangan pendidikan yang telah dirintis oleh pengarah-pengarah yang terdahulu.

"Keutamaan kita ialah bagi memastikan sistem pendidikan peringkat rendah dan menengah di wilayah ini dapat berkembang maju seiring dengan negeri-negeri yang lain dan kita tidak mahu ketinggalan di belakang. Kemudahan-kemudahan fizikal, infrastruktur dan modenisasi dalam pendidikan akan ditingkatkan dari semasa ke semasa" kata beliau lagi.

Majlis serah tugas jawatan telah berlangsung pada 05 Mac 2021 secara dalam talian sesuai dengan amalan norma baharu bagi mengekang penularan Covid-19. Warga Jabatan Pendidikan W.P.Labuan mengucapkan setinggi-tinggi tahniah di atas pelantikan ini dan komited untuk terus menabur

khidmat bakti setia demi menjamin kelangsungan kecemerlangan dan kemenjadian murid dan kualiti sekolah di Labuan.

Berita Oleh : Sektor Perancangan



Majlis Sanjungan Budi mantan Pengarah Pendidikan Puan Khaziyati Osman secara maya. Menabur bakti selama 18 tahun di Jabatan Pendidikan W.P Labuan. Tahniah di atas pelantikan sebagai Pengarah Institut Aminudin Baki (IAB) Negeri Sabah. Terima kasih atas segalanya. Jasamu sentiasa dikenang !

**Program Kibar Bendera
Sempena Sambutan Hari
Wilayah Tahun 2021**



Labuan 25 Februari – Sebagai tanda solidariti terhadap program-program yang dilaksanakan sempena sambutan Hari Wilayah Persekutuan tahun 2021 ini, Pengarah Jabatan Pendidikan Wilayah Persekutuan Labuan Puan Khaziyati binti Osman telah mengamanahkan Sektor Pembangunan Murid untuk menjadi urus setia bagi menyemarakkan semua program yang dicadangkan sempena sambutan Hari Wilayah ini.

Tuan Haji Abdul Rahman bin Ahmad selaku Timbalan Pengarah Sektor Pembangunan Murid bersama-sama dengan semua pegawai Sektor Pembangunan Murid telah mengagihkan bendera Wilayah Persekutuan kepada semua sekolah dan juga premis jabatan pendidikan untuk menjayakan program kibarkan bendera Wilayah Persekutuan ini bermula pada 31 Januari hingga 28 Februari 2021.

Alhamdulillah program kibarkan bendera Wilayah Persekutuan ini sedang berlangsung dan telah mendapat sokongan dan kerjasama yang amat baik dari semua sekolah dan juga pihak JPN untuk sama-sama menyemarakkan program ini.

Bagi pihak urus setia dan Sektor Pembangunan Murid, kami merakamkan ucapan setinggi-tinggi terima kasih kepada

Puan Khaziyati binti Osman, Pengarah Pendidikan Wilayah Persekutuan Labuan atas keprihatinan dan memberi kepercayaan kepada Sektor Pembangunan Murid untuk menerajui program sambutan kibarkan bendera Wilayah Persekutuan pada tahun 2021 ini. Tidak lupa juga ucapan setinggi-tinggi terima kasih kepada semua pentadbir sekolah yang bersama-sama turut menyemarakkan program ini.



SMK Mutiara



SK Patau Patau

Warga Pendidikan Labuan Raikan Hari Wilayah Persekutuan



Semua warga pendidikan Labuan telah menunjukkan tanda prihatin dengan menyertai kempen kibar bendera Wilayah Persekutuan sempena sambutan hari Wilayah Persekutuan Tahun 2021 sepanjang bulan Februari.

Dengan tema **"Wilayah Persekutuan Wilayah Prihatin"**, warga pendidikan telah disaran memeriahkan suasana dengan menyalakan lampu bagi mewujudkan suasana 'perayaan' dan mengibarkan bendera wilayah di bangunan-bangunan milik Kementerian Pendidikan Malaysia di pulau ini.



SOLIDARITI : Bangunan Sektor Pembelajaran di Bukut Kalam turut bermandikan cahaya.



INDAH : Suasana bergemerlapan menghiasi pintu pagar SK Bukit Kalam.

Timbalan Pengarah Sektor Pembangunan Murid (SPM), Tuan Haji Abdul Rahman bin Ahmad yang juga penyelarass program ini, berkata semua sekolah telah menunjukkan solidariti terhadap sambutan hari wilayah dengan mengibarkan bendera di setiap sekolah masing-masing.

“Kita mengetengahkan konsep pencahayaan untuk menimbulkan rasa keterujaan terhadap sambutan tahun ini walaupun bukan dalam bentuk pertandingan. Usaha pihak sekolah ini merupakan langkah tepat dalam menyemai semangat patriotik dalam kalangan murid-murid sesuai dengan imej institusi pendidikan” katanya lagi.



KREATIF : Kolej Vokasional turut memasang hiasan lampu bagi menyemarakkan sambutan.

Pusat Ko-Kurikulum Negeri, Jabatan Pendidikan W.P. Labuan telah dijadikan pusat sambutan bagi warga pendidikan. Selain itu semua sekolah rendah dan menengah, Bangunan Ibu Pejabat, bangunan SSTP, bangunan Sektor Pengurusan Maklumat ICT dan bangunan Sektor Pembelajaran di Bukit Kalam turut bersama-sama meriahkan sambutan dengan mengibarkan bendera di lokasi-lokasi strategik.

Pengarah Pendidikan Wilayah Persekutuan Labuan, Puan Khaziyati Osman turut merasa bangga dan menzahirkan ucapan terima kasih atas kebersamaan yang telah ditunjukkan oleh warga pendidikan semua peringkat dalam menjayakan kempen kibarkan bendera Wilayah Persekutuan tahun ini.


“Kita sebagai warga pendidik perlu sentiasa berada di hadapan dalam mendidik murid dan ahli masyarakat dalam menyemai rasa kecintaan terhadap negara. Sambutan masih boleh diteruskan dengan pematuhan rapi segala prosedur operasi standard (SOP) sesuai dengan norma baharu” ujar beliau lagi.

Berita Oleh : Sektor Perancangan



MERIAH : Bangunan ibu pejabat juga tidak ketinggalan bagi meraikan kemeriahan sambutan.

Bengkel Pemantapan Pembelajaran Berasaskan Projek (PBP) STEMEC Guru SMK Taman Perumahan Bedaun Bersama SISC+



25 Februari 2021 (Khamis) – Bengkel Pemantapan Pembelajaran Berasaskan Projek (PBP) STEMEC pegawai SISC+ bersama warga guru SMK Taman Perumahan telah dilaksanakan pada Khamis lalu. Bengkel PBP STEMEC ini disampaikan oleh pegawai SISC+, Puan Arni Samiraty Abdol Samad.

Pendekatan bengkel ini membabitkan pelaksanaan dalam Pembelajaran dan Pemudahcaraan (PdPc) dengan menggunakan kaedah pedagogi iaitu Pembelajaran Berasaskan Projek (PBP). Program pembudayaan PBP direncanakan untuk menggalakkan inovasi dalam Pembelajaran dan Pemudahcaraan (PdPc) sekali gus berlakunya pengintegrasian teknologi.

Bengkel ini berlangsung secara dalam talian melalui aplikasi 'Google Meet' dan dihadiri oleh 40 orang guru SMK Taman Perumahan Bedaun. Turut mengikuti bengkel ini Penolong Kanan Pentadbiran, Puan Chai Yee San, Penolong Kanan Kokurikulum, Puan Lau Chin Ying dan Penyelaras PBP STEM SMKTPB iaitu, Puan Roselyn Gubal .

Bengkel yang disampaikan oleh Puan Arni Samiraty dapat membentuk kesediaan guru dalam pembaharuan Pendidikan terutamanya dalam PdPc guru. PBP yang dilaksanakan di sekolah perlulah selaras dengan keperluan kurikulum sebenar iaitu dapat mewujudkan pembelajaran berdasarkan

pendekatan inkuiri.

Menurut Puan Arni Samiraty, dalam merancang aktiviti PdPc, guru perlu merungkai keperluan kurikulum berlandaskan pada Dokumen Standard Kurikulum dan Pentaksiran (DSKP), Objektif Pembelajaran (OP) dan Standard Kandungan (SK) bagi sesuatu subjek.



Puan Arni Samiraty : Penceramah Bengkel Pemantapan Pembelajaran Berasaskan Projek (PBP) yang juga Pegawai SISC+ di Jabatan Pendidikan Wilayah Persekutuan Labuan. Melalui PBP yang dilaksanakan oleh guru di sekolah, pelaksanaan PBP mewujudkan persoalan yang akan dijawab oleh pelajar. Dalam konteks ini, guru atau pelajar mengemukakan satu tema persoalan yang akan memandu pelajar membuat projek secara berkolaborasi.

Projek ini mengintegrasikan pelbagai subjek dalam kurikulum seperti subjek Bahasa Melayu, Sains, Pendidikan Jasmani dan Reka Bentuk dan Teknologi. Pengintegrasian pelbagai subjek ini dapat mewujudkan pendekatan STEM Pembelajaran Berasaskan Projek (PBP). PBP dalam PdPc memerlukan pelajar menjawab persoalan dunia sebenar berlandaskan pengetahuan secara holistik dalam kalangan murid.

Menurut Puan Arni Samiraty lagi, sebelum guru membuat

Rancangan Pengajaran Harian (RPH), guru setiap mata pelajaran perlu mempunyai pengetahuan untuk merungkai kurikulum sebenar. Dalam penulisan RPH, setiap ayat dalam Standard Pembelajaran (SP) dan Standard Kandungan (SK) perlu diletakkan dua perkara utama iaitu aspek pengetahuan dan kemahiran. Oleh itu, perbincangan dalam kalangan guru mata pelajaran sangat penting untuk menghasilkan penulisan RPH yang selaras seperti memperkenalkan Toolkit Merungkai Kurikulum.

Secara keseluruhan, kaedah PBP STEMEC merupakan salah satu daripada amalan terbaik dan inovatif dalam proses PdPc yang berasaskan penyelesaian masalah. Pada masa yang sama, bengkel ini dapat melatih guru untuk mengaplikasikan kaedah PBP dalam PdPc yang bersesuaian dengan kebolehan murid.

Pelaksanaan PBP memberi peluang kepada murid untuk terlibat secara aktif di dalam pembelajaran, malah dapat melahirkan murid yang berkebolehan menguasai konsep, kemahiran dan berupaya menggunakan pengetahuan saintifik dalam kehidupan sebenar.

Berita Oleh : SMK Taman Perumahan Bedaun